

Monsieur

4
J'ay receu la lettre
qui vous a pleu m'escrire, avecq beaucoup de desplaisir d'entendre que
vous croyez que Je me sois plaind de vostre personne, puis que Je ny ay
pas pense, et qu'au contraire Je me sens fort obligee des soins quelle
m'a fait la faueur de prendre de parler a l'Alteze de Monseigneur le
Prince d'orange et me faire enuoyer son Basteau a Emmerick, dont
Je luy ay en particulier vne extreme obligation et luy en rend encore
graces tres humbles, et a vous mille Remerciemens par escrit, attendant
que ce puisse estre de bouche, croyant que Monsieur de Haute Ruc,
qui m'a fait beaucoup de faueur en passant a Breda, aura mal
entendu ce que Je luy en ay dit; Cependant Je viuray en espoir d'estre
honoree dudit Basteau apres le mariage de ma fille, et Je prens
encore la confiance de vous faire vne autre supplication, qui est de
me fauoriser vers saditee. afin qu'il luy plaise d'ordonner a
Monsieur Verelts, d'acheuer au plustot la liquidation des Rent
hypothecques dessus les biens de la maison d'orange, laquelle est
estee entommece par ordre de l'Alteze de feu Monseigneur le Prince
d'orange, par ledit Verelts, Estant tres necessaire qu'elle ^{s'acheue} Jusques au
commencement de la paix, d'autant que les finances du Roy, qui
ayants Jouy desdits biens, n'en ont pas paye le cours des Rent, et
dont Nous deburons auoir du profit, sur ce Je m'offre a vous
rendre quelque seruice agreable par deca et suis veritablement

Monsieur

Ma fille ma prie de vous
faire ses tres humbles
bailemens.

4
Monsieur

Monsieur de Salicem Conseiller de l'Alcege de Monsieur
le premier d'orange.

A La Haye